

www.BibleForChildren.org

Mateo 8



Ne nekezuwa zutun duen eseweey ziyà te inged he Kana he ziyà te prubinsya he Geliliya, ne midtelavuk is iney ni Jesus. Ne zutun daan si Jesus wey is minge sumusundan din, su neumbita zaan sikandan he medtelavuk dan.



Ne naamin is binu he igastu zutun te eseweey, umba mibeyaan si Jesus te iney zin. Ne ke sikandin te, "Wazè dan en binu." Ne is iney zin, migkegiyan din is mengine suluguen te, "Tumana niw is minsan hengkey he sugù din keniyu."



Migkegiyan ni Jesus is munge suluguen te,
"Penua niw heini te wahig." Ne mibpemenù
dan haazà is munge umuy taman te vivig.
Ne mid-uman megkagi si Jesus te, "Sekilut
kew en wey uwita niw ziyà te edumala kayi
te keemuran."



Ne mid-uwit dan, ne is edumala, migezaman din haazà is wahig he mibaluy en he vinu. Wazè din metueni ke hendei ebpuun haazà is binu asal netuenan te munge suluguen he midsekilut dutun.



Ne haazà is edumala, mid-umew zin haazà is
ebpengesawa, ne migkegiyan din te, "Sumalà te
vetasan tew, ke zuen
keemuran, ibpenagey
idhuna is utew metaam he
vinu, ne emun dekelè en
is egkeinum te munge
etew human ebpeneɣaya
is kenà utew
metaam."



"Iyan, sikew, guntaan nu
en penegaya heini is binu
he utew metaam!"
ke sikandin.



Iyan haazà nehuna he egkein-inuwan he mibeelan ni
Jesus; midhimu zin diyà te inged he
Kana ziyà te prubinsya he
Geliliya, . . .




. . . ne pinaagi zutun impeehè din is dekelà he
gehem din ne midtuu kandin is minge
sumusundan din.



Ne midhendiyà si Jesus te valey ni Pedro ne zutun neehè din is enugang he vahi ni Pedro he edetengen ne kenè en ebpekeenew.



Ne midampà ni Jesus is belad dà dutun te meritan ne zutundutun neulian. Ne mid-enuw haazà is meritan ne midsuba sikandin te ibpekaan din engki Jesus.




Ne hein edsanlep en is andew zutun, is langun he egkengezeruwan wey is ebpenlelungen te mezaat he mulin-ulin, mibpen-uwit sikandan te munge etew ziyà te ki Jesus. Ne utew mezakel he munge etew zutun te inged is netipun diyà te lama te valey he zutun si Jesus.



Ne zuen mezakel he egkengezeruwan dutun te migkelingulingu he minge zaru is nengeulian ni Jesus. Mezakel zaan he minge mezaat he mulin-ulin is impemaawè din puun dutun te minge etew. Ne haazà is minge mezaat he mulin-ulin, wazà tuguti ni Jesus he mekekagi sikandan su nekilala zan ke hentei si Jesus.



Ne mezakel zutun te munge etew is egkesuat he egawed diyà te ki Jesus, su zuen gehem he ebpuun diyà te kandin ne pinaagi zutun egkengeulian is langun te sikandan.



Ne zutun, duen nemekeuma he minge etew he ed-uwit
te sevaha he etew he minatey is divaluy he lawa zin.
Ebintingen haazà is etew te heepat he zuma zin.



Ne kenè dan ebpekeuvey ziyà te ki
Jesus tenged te utew mezakel he
menge etew he
nengeamur-amur zutun.



Ne zutun mibudsiyan dan is
atep he renged ni Jesus ne hein
meluag en haazà is budsi, ne
midteyuntun dan diyà te ki
Jesus haazà is etew he
impehizegà diyà
te zuyanè din.



Ne si Jesus, hein nesavut din he zekelà is kedsarig dan kandin, migkegiyan din haazà is etew he minatey is divaluy he lawa zin te,
"Mama, nepesaylu en is minge salè nu." "Sikew, Mama, enew ka; kuwaa nu heeyan is duyanè nu ne uli ka."



Ne zutun, mid-untud si Jesus te
zekelà he avang ne miduma
kandin is minge sumusundan
din.



Ne hein diyè dan en te lawed, ne
midtekewtekew mebpengeramag te
utew mevendes ne
egkeselikuvungan
en te vagel haazà is
avang. Iyan, nekelipezeng
dutun si Jesus.



Ne migkagi si Jesus, "Maan is egkehandek kew? Maan is kenè kew ebpekesarig kediey?" Ne mid-enew si Jesus ne migkegiyan din haazà is keramag wey haazà is minge vagel he med-engked dan. Ne zutun mibmelinew utew. Nengeinuinu is langun he minge zuma zin. "Hengkey he etawa heini?" ke sikandan, "su minsan is keramag wey minge vagel ne



ebpeming kandin!"



Utew mahal ziyà te gehinawa te
Megbevayà is tivuuk menusiya, ne
tenged kayi minsan sikan is budtung he
Anak din wazè din menuguni,
kekenà, impehendini zin su wey
is langun edtuu kandin, . . .



. . . kenà mesiluti is gimukud dan,
kekenà, mevegayi sikandan te
untung he wazà pidtemanan.



Ruma 3:23 Nekesalà is tivuuk he menusiya ne utew en sikandan meziyu te ketulusan he ibegey te Megbevaya.

Ruma 6:23 Ke zuen etew he ebpevayabayà te suat te mekesesalà he lawa zin ne zuen silut kandin he iyan is kemetayen he wazè din pidtemanan. Iyan, is etew mulà he edtuuwan din si Jesu Kristu he Nengazen tew, duen ibegey kandin te Megbevaya he iyan is untung he wazè din pidtemanan.

Hibriyuhanen 9:27 Imbanglis te Megbevaya diya te menusiya is kebpatay te kesevaha, ne egkeipus dutun te kebpatay zin ne edsusiyen te Megbevaya is munge ulaula zin.



Ipisu 2:8,9 Su tenged dà te gagew zin kenita, midlibri ki zin te silut dutun te kebpeketuu ta. Wazè ki melibri pinaagi te kenita he vaal, kekenà, imbegey zà kenita is untung he wazè din pidteman. Ne tenged dutun, wazà etew he igkezantal zin is kedlibriya kandin te silut su kenà iyan is kandin he ked-ul-ulaha te meupiya ingkelibri zin.

Ruma 10:9,10 Ne emun edtudtulen niw ziyà te zuma he iyan en Nengazen si Jesus, ne emun hustu is kedtuuwi niw he mibanhew sikandin te Megbevayà, egkelibri kew te silut te Megbevayà. Su pinaagi te isip ta ke edtuu ki ed-isipen ki te Megbevayà he metazeng, ne zutun ebpenudtulen ta ziyà te zuma is kedtuu ta ne human egkeheget is kedlibriya kenita te silut.



Juan 3:16,17 Utew mahal ziyà te gèhinawa te Megbevayà is tivuuk he menusiya, ne tenged kayi minsan sikan is budtung he Anak din wazè din menuguni, kekenà, impehendini zin su wey is langun he edtuu kandin, kenà mesiluti is gimukud dan, kekenà, mevegayi sikandan te untung he wazà pidtemanan. Is Megbevayà, wazè e zin is Anak din sugua zini te kelibutan te kedsilut te menusiya, kekenà, su wey pinaagi kedì melibri is menusiya.



1 Juan 5:11-13 Is Megbevayà, imbegey zin kenitew is untung he wazà pidtemanan; ne ziyà ebpuun heini is untung te Anak din he si Jesus. Iyan heini sikan is kebpenistigus kenitew te Megbevayà. Is minsan hentei he nekidsevaha te Anak te Megbevayà, duen din en untung he wazà pidtemanan. Is minsan hentei he wazà mebpekidsevaha te Anak te Megbevayà, wazè din untung he wazà pidtemanan. Sikiyu is nemeketuu en te Anak te Megbevayà, ebpesuratan ku sikiyu wey niw metueni he zuen niw en untung he wazà pidtemanan.



Mateo 8-9; Marcos 1-2, 4; Lucas 4, 8; Juan 2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: E. Frischbutter; Sarah S.

Manobo, Western Bukidnon NT (mbb) © 2001, Wycliffe
Bible Translators, Inc., All rights reserved.

<https://live.bible.is/bible/MBBWPS/MAT/1>

©2026 Bible for Children, Inc.

www.M1914.org

www.bibleforchildren.org

